



Persidangan Antarabangsa di Nahda University Mesir

Universiti Malaysia Perlis (UniMAP) menapak selangkah lagi di persada antarabangsa apabila bekerjasama dengan Nahda University, Mesir, dalam menganjurkan persidangan bertajuk "Developing Higher Education in the Arab and Islamic World at the Age of Globalization and Knowledge". Persidangan selama dua hari itu berlangsung di Triumph Hotel, Mesir, dirasmikan isteri kepada bekas Presiden Mesir Dr Jehan Al Sadat.

Ia disertai kira-kira seramai 250 peserta yang terdiri daripada pengurusan utama universiti, pentadbir serta ahli akademik dari seluruh benua Arab, Sepanyol, Indonesia dan juga Malaysia. Timbalan Naib Canselor (Penyelidikan dan Inovasi) UniMAP, Prof. Dr. Abdul Hamid Adom yang mewakili Naib Canselor UniMAP diberikan penghormatan untuk menyampaikan Ucaptama pada persidangan tersebut.

Bersempena dengan persidangan tersebut, delegasi UniMAP turut dijemput untuk melawat Nahda University yang terletak di Beni Sewiff, 150 kilometer dari Kaherah disambut oleh Presidennya, Profesor Seddik El Efifi serta barisan pengurusan utama universiti. Agenda lawatan tersebut adalah perbincangan kerjasama UniMAP dan Nahda University. Delegasi turut dibawa melawat ke fakulti perikanan, kejuruteraan dan komunikasi yang terletak di dalam kampus dan turut dibawa ke sesi temuramah bersama Nahda TV dan Radio.

Nahda University merupakan sebuah institut pengajian tinggi swasta yang sedang melonjak namanya di Mesir dan mempunyai seramai 5,000 pelajar.

Turut serta dalam lawatan tersebut, Pengarah Pusat Bahasa Antarabangsa UniMAP, Prof. Dr. Harshita Aini Haroon, Pegawai Khas Naib Canselor, En. Shafiq Hizwari dan Pensyarah Kanan Pusat Pengajian Pembangunan Insan Dan Teknokomunikasi UniMAP Dr. Amani El Ali. Sebelum Pulang ke Malaysia, delegasi UniMAP turut mengambil kesempatan untuk melawat Rumah Perlis di Kaherah yang menjadi premis penginapan bagi Keluarga Pelajar Perlis (KPP).

